

澄城縣志

地
170.149
275
21

澄城縣志序

澄城誌成敖尹佐刻之木夫誌貴明實文次之開卷一覽衆美畢見得志之體矣誌蓬萊于溟海退處士于游俠非無文也飾虛車爾近見作誌者徒以前人目錄分更改革務立殊稱以新耳目然益晦而不能自淆而不能真焉焉用誌是故於其繪也甯素可也澄城吾西安巨邑舊無誌書誠爲缺典嘉靖己酉徐尹效賢屬國子生石子道立纂著焉脫稿將梓而徐尹卒庚戌敖尹來治是邦取石子稿更加潤色大光祿谿田馬公述始末爲題辭石子復序諸前後石子勤學求志孝廉士也澄邑繁劇素號難治敖尹爲政暇及於文事其治行可徵矣爲之序嘉靖辛亥春三月下旬

澄城縣志

卷一

石本

賜進士出身資善大夫參贊機務南京兵部尚書前吏部右侍郎右春坊 太子右庶子兼翰林院 國史修撰 經筵講官苑洛韓邦奇書

澄城縣志題辭

世孰爲大文獻居先文獻弗足聖明焉傳郡邑有志是爲之文山川聖明賴以著存嗟伊澄城西安巨邑迺無志文君子所急嘉靖己酉徐令效賢有志斯文採獻纂編明季庚戌敖率佐營腫徐芳躅斯文迺成石子道立文發于質聚書攷索仍恭秉筆教諭魏子司訓二王爰加較正借敷腎腸谿田馬氏覽知攸珍是用題辭歸諸梓人嘉靖辛亥春三月穀雨日賜進士出身中大夫南北光祿寺卿谿田居士馬理撰

澄城縣志目錄

一卷

地理志 沿革 分野 邑名 疆域 山川 形勢
橋渡 井泉 古蹟 陵墓 景致 風俗
災祥

建置志 城池 縣署 儒學 社學 諸行署 雜署

舖舍 鄉里 鎮堡 市集

祠祀志 祠廟 壇壝 寺觀 附

田賦志 田畝 戶口 田賦 丁賦 課程 物產

二卷

官師志 封錫 職官 知縣 縣丞 主簿 典史

澄城縣志

卷一

二

石本

教諭 訓導

人物志 宦達 選舉 進士 鄉貢 歲貢 例貢

孝子 烈女 節婦 義士 戚畹 封贈

武職 仙釋

雜志 附 陶枕 文鬼 人妖 闕疑 正訛 補遺

夫志古國史之流也古史廢於秦而後志興焉郡邑各有志所以明典章寓政化志不作郡邑無史矣是故識治體者先之澄城久闕志嘉靖丙午邑大夫江津徐侯效賢始請諸澗源楊先生庭纂修之遽卒矣而未就也已酉春再命予小子於是作今志俾將來有攷焉夫惟王體國經野莫先於地縣之建地其輿也故受之以地理官府次舍無去守以聽政也

故受之以建置秋報春祈民居迺奠故受之以祠祀時使薄
斂民生迺休故受之以田賦奠土質民育才宣化必有司存
矣故受之以官師名世才俊光啟後先流風丕式矣故受之
以人物事不以類論不以緒可以觀事變備遺亡故受之以
雜志終焉藝文必有關風教政體吏習民隱者依類附錄外
是卽雄篇巨什悉黜不載志凡七篇今析爲二卷是歲六月
四日邑人玉泉石道立子脩謹識

澄城縣志一卷

玉泉石道立 撰次

儒學教諭魏天瑞訓導王畿王廷弼 校正

地理志第一

沿革

澄城禹貢雍州之域春秋時為晉北徵地 徵音懲 後屬秦 春

秋文公十年秦伐晉取北徵遂為秦地 漢始置徵縣屬左馮

翊徵澄同音後誤為澄東漢省晉為重泉地屬馮翊郡元魏

太平真君七年析郃陽縣置澄城郡隋開皇三年罷郡以縣

屬同州唐武德間析置長甯縣 今縣西北長甯河有城址存

焉 貞觀省 一本作後省 長慶四年割隸奉先縣五代梁屬河

澄城縣志

卷一

四

石本

中府後唐同光元年 一本作三年 復隸同州宋金元因之

國朝仍為澄城縣隸西安府同州

分野

井鬼之宿鶉首之次 歷代天文志皆井鬼分野

大明清類分野書云井鬼在未自井九度至柳三度屬秦分

雍州山堂考索云鶉首秦也唐一行云天下山河之象存乎

兩戒秦據百川上流得兩戒山河之首故為鶉首今按左馮

翊地實秦分野澄城屬焉故同

邑名

古徵 前漢地理志顏師古註曰徵音懲即今之澄城縣是也

左傳所云取北徵即此地耳

疆域

東郃陽東南朝邑南同州西南蒲城西白水西北宜君北維
川東北韓城廣五十里袤一百五十里

山川

武帝山 在縣東北七十里上有漢武帝廟相傳帝遊梁山時
經歷於此土人立廟祀之

將軍山 在縣北六十里山巔有秦武安君白起廟故名山下
迤南有村曰社田相傳爲起食邑居民姓白疑其苗裔與

社公山 在縣北五十里上有社公社母廟疑卽方社之神
界頭山 在縣西北七十里北曰維川南曰澄城此山間於兩
縣故名

澄城縣志

卷一

五

石本

壺梯山 在縣西北五十里邑人喬廷左卽山巔建去帝廟

伏鳳山 在縣西二十里

石樓山 在縣北七十里山形如樓故名

石門山 在縣西北七十里

麻林陂山 在縣西北七十里

臨高原 在縣南五十里宋名臣言行錄李忠襄公顯忠知同
州以計執金撒離喝後由漢村經臨高原撲地河奔入夏國

石道立曰將軍山麓泉三源合之水可盈斗中隔土嶺一
里許鑿引達縣可以利民撫按移檄查修今尙未舉時其
有待乎

洛河 在縣西二十里

長甯河 在縣西北四十里卽雲門紅羅二谷水所會西南入於洛

大谷河 在縣東二十里爲郃陽縣分界

撲地河 在縣東二十里

三里澗 在縣西三里許

洗腸泉 在三里澗南百餘步金沙谷下東晉高僧佛圖澄開脇浴腸之地故名迄今油膩如星浮在水面每早暎禱雨其應如響

隋公泉 在縣西北三里許隋文帝避暑時宮娃浴此故名泉形如匱又名匱谷其水清澈可愛凡達人騷客尋春修禊者攜北海之樽領東山之妓酌水煮茗臨流泛觴往往於斯焉

澄城縣志

卷一

石本

藍田諸呂俱有題名適菴老人遊隋公泉詩曰往事無窮莫漫傷野泉今日水猶香最憐清澄明如鏡幾度宮娃照晚粧
捌槍泉 在縣南三里相傳漢武帝經此捌槍於地有水湧出故名

甘泉 在縣西北四十里出自匱谷水味甘美俗名縣西河

澄泉 在縣西三里水之源潔流清故名俗名官泉釀酒香美邑人多用之會甘泉入于洛

玉泉 在縣西北五十里老樹偃仰怪石巉巖其泉濱崖而出瑩潔如玉雖隆冬水芹夾岸馥翠不啻春夏焉泉下又有蔬圃藥畦引流灌溉元西臺御史彭衙潘汝劫遊玉泉詩曰十日遊山歸未能杖藜又作玉泉行長林平許如人意時送一

天風雨聲

陰泉

在縣西北三十里泉自崖陰而出味極甘冽渠引達白雲觀內可流入廚或匯爲塘或分爲遂餘漫於溝矣

三泉

在縣東北十五里其泉源有三復合爲一

龍泉

在縣南五十里帶洛溝味甘如醴故近泉村落因名曰醴醐曰酥酪隋文帝居同州每取食焉

雲門谷

在縣西北五十里谷口若門水氣如雲故名

紅羅谷

在縣西北七十里谷之土色狀若紅羅故名

金沙谷

一名金溪在三里澗南百餘步晉高僧佛圖澄永嘉四年入中國栖息於此

柏谷

在縣北七十里舊多柏故名

澄城縣志

卷一

七

石本

風洞

一名風谷在石門山麓其深叵測天將風洞中先有聲響振崖谷風欲息聲響復如初

三娘子川

在縣西北三十里

形勢

前拱原阜

謂臨高原

後倚山壠

謂武帝諸山

大谷河繞其左

甘泉水羅其右縣治宅中風氣攸萃誠三輔之各地馮翊之

雄邑也

橋渡

崆峒橋

在縣西十里

天險門

俗名空子橋在縣西北八十里嘉靖丙午知縣徐效賢奉檄創築扁曰天險典膳關中人督修

洛河渡 在縣西二十里

井泉

芳泉 縣舊無井遠汲三里澗中宏治間知縣徐政卽預備倉鑿一井因自扁曰芳泉

徐公井 嘉靖丙午北虜猖獗知縣徐效賢擇城中隙地鑿四井以戒不虞邑人取汲稱便名曰徐公井

雙泉 嘉靖庚戌知縣敖佐因城中水鹹卽社稷壇鑿二井水清且甘祭祀飲食神人共賴俗呼雙泉

古蹟

避暑宮 在縣東北五十里乃隋文帝避暑離宮林木交加河流盤曲一方之奇觀也水環宮後岸善崩碑刻沈沒無可攷

澄城縣志

卷一

八

石本

後改爲治平寺

隋文帝莊 相傳在避暑宮迤西漫無可攷惟金大定二十七年重修岱嶽廟記云古蹟則有隋文帝魏公成之舊莊今且失其處矣

鄭公莊 卽修善村今名大賢村在縣北二十五里唐太宗所賜魏徵莊也其子孫世居焉宋浮休居士張舜民過此有詩曰兒童不識字耕稼鄭公莊或云良輔鎮西亦有魏莊

北徵城 在縣西南二十五里蒲城縣界俗名避難堡左傳秦伐晉取北徵卽此

王官城 在縣西北四十里左傳穆公伐晉取王官卽此城址尙存

長甯城 在長甯河之南唐初析置長甯縣卽此遺址尙存

新城 在縣東北二十里左傳秦伐晉圍邲新城卽此

萬里長城 在縣南三里許遺址尙存今按蒙恬斥逐匈奴收河南地爲四十四縣築長城起臨洮至遼東延袤萬餘里暴師于外十餘年恬常居上郡統治之今吾邑所云萬里長城恐非蒙恬所築者觀東坡指掌春秋列國圖自見

親鄰寨 在縣北二十里元陝西平章李思齊命將所築以爲屯守

句倉驛 在縣東南寺頭鎮

撲地驛 在縣東撲地河

賢相驛 在縣西北良輔鎮因魏鄭公得名

澄城縣志

卷一

九

石本

石道立曰諸驛相傳謂設於宋廢於元今吾邑馬牛驛站給他驛遞謂斯地非要衝故也比見河南山西及戍邊軍士入延綏榆林一帶者往往繇之自北而南者亦然使者過越縣官卒無以辦夫馬輒令里甲顧賃民不勝其擾安得復前一驛分站之給他處者以自供民庶其少休乎

陵墓

東晉佛圖澄墓

在文廟南下俗傳爲澄藏骨處今按神僧傳

晉穆帝永和四年十二月八日澄卒於鄴宮寺窆於臨漳西紫陌初石虎殮澄時以生時錫杖及鉢納棺中後開棺惟得鉢杖不復見屍或言澄死之日有人見澄於流沙今此地云有澄墓未知是否邑人張雲谷詩云不知燼骨埋何地猶指

宣尼廟下陵謂此墓也

唐魏徵墓 在縣北大賢村

高相成墓 在縣東十里西下村

宋楊宣撫墓 在縣東南三十里宋楊業之後有碑為人竊去

今其裔世官播州

金師節婦墓 在縣南雷莊村墓表一通進士王嘉猷撰今毀

惟有明昌三年八月原降省符碑一通在焉

國朝潘尙書孟舉墓 在縣北遮路村

雷御史恭墓 在縣西北三十里洛城村今按二君子在

昌時爲邑中之望特與筆其墓

石道立曰澄城陵墓世遠傳訛不志可也然蒼梧九疑史

澄城縣志

卷一

石木

亦並載魯衛五父過者與哀矧衣冠弓劍藏以爲墓又古人所不廢因疑而盡削之則司墓之祭亡而採樵之禁弛矣故志之以存古蹟係民思其真與僞又何暇深辯乎哉
景致

荒陵暮雨 謂魏氏陵 古寨寒煙 謂親鄰寨 雲門素練 謂雲門

谷羅谷丹霞 謂紅羅谷 浴腸故地 謂洗腸泉 避暑遺宮 謂隋

文帝避暑離宮 壺山樵子 謂壺梯山 沮水漁翁 謂洛河渡

風俗

尙氣概先勇力有強毅果敢之資無驕情浮靡之習 詩傳性

剛而好勝 事文類聚 三輔屬邑自古號爲難治 艾元老遺愛

碑大較前輩風俗重農事勤女紅儉約朴實拙於服賈民有

童而野處華顛未識公署者士則悅理義好讀書仕者尙廉
介而賤乾沒乃今不盡然凡民率暴悍使氣輕視法令歸訟
避征徭士則志於學而恥好問婚姻則專論財喪葬則事繁
文泥風水嗚呼傲也久矣轉移化導之機不存乎人哉 張雲
谷詩云把酒思閒事民風漸不淳婚姻貪厚幣喪葬弄虛文
服飾誇新巧收成諂鬼神憑君勸一醉醉了若無聞

石道立日吾邑何以號難治也蓋暴秦之強悍漸於前徙
豪之後靡雜於後故耳余又謂倡之有機焉夫一雍州也
化於姬德則閒田而興讓習於嬴弊則相稽而反唇斯豈
土壤之殊哉亦政教之移人也揚子曰御得其道則狙詐
咸作使御失其道則狙詐咸作敵握化機者其圖之

澄城縣志

卷一

七

石本

災祥

宋大觀丁亥冬無雪元元貞元年春夏大旱無麥 是歲縣尹

郝思仁竭誠懇禱大獲甘澍歲乃有秋 泰定四年春不雨二

麥俱枯百穀失播 天曆二年大饑至正十九年夏蝗入境不

爲災 是歲六月終縣南遵教社飛蝗遍野達魯花赤赤只兒

民反奉幣告奠蝗入鄰境歲不爲災

國朝吳二年春不雨永樂八年秋大霖雨 七月初雨五旬始

止 正統二年歲饑成化二十一年大饑 死者枕籍人相食都

御史崢山梁璟澄城賑貧詩曰匹馬馳驅未敢安可憐黎庶

日凋殘無端蝟役終身苦百結鶉衣透骨寒村落荒涼雞犬
散妻孥奔走道途難鸞坡肉食知多少莫道身心得自寬 正

德七年妖賊作亂 李午事見延恩祠記 十三年初夏雹雨無

麥 雹積地尺餘踰月始消 十五年十二月二十三日雪樹 俗

名樹架關東謂之樹孝雪霽後有此多主豐穰 嘉靖七年歲

歉 是歲麥田收十之三秋不登斗米需銀二錢 八年夏大蝗

是歲蝗飛蔽日自東南入縣境食民禾稼萬井騷然 十年夏

無麥大饑 自春徂夏旱甚麥盡枯死迄冬發內帑銀以賑張

雲谷早詩日地赤天黃日日風野雲恣傲懶從龍龜腸舊苦

看將又婦哭夫啼破屋中 二十四年北方白龍見 去縣四十

里大雨如注頃刻水深三尺 二十六年七月麻林陂山移都

御史謝蘭奏

聞奉

澄城縣志

卷一

三

石本

聖旨該部知道

聖諭朕仰荷上天眷佑近復蒙此仁愛之警卿等宜加修省

仍宣示百官各務脩舉實政無尙虛文以副朕意八月嚴霜

殺稼 迄冬米價騰湧

石道立曰世謂災祥休咎天也非人之所能爲也傳有之

和氣致祥乖氣致異則休休咎咎可盡歸之天邪其人哉

其人哉

建置志第二

城池

土城方三里有奇建築莫知所始正統景泰宏治重修嘉靖

丙午北虜猖獗知縣徐效賢奉檄築壘高深倍昔戊申乃重

修四城門 北門知縣鄭光溥改建今復藻飾焉 洞螿以甃門

龔以鐵已酉又建四郭門各有記 時南郭門未就今知縣敖佐始完之

縣署

在城內西北隅莫考所自建元末毀於兵燹

國初縣治徙於親鄰寨洪武二年縣丞樂韶躬詣督府稟命

復故治廨宇塵居尋就規繩正統三年知縣楊季琦更建廳

事儀門大門至趙瑾則改建大門為譙樓楊泰徐政又相繼

恢治焉嘉靖甲辰知縣鄭光溥重修譙樓扁其前曰封聯秦

晉後曰鞠拊黎元諸公署加藻飾焉兵部尚書苑洛韓邦奇

撰記 尙存 戊申知縣徐效賢迺新房科葺獄禁建馬廄已酉

澄城縣志

卷一

又飾堦祀廣儀門庚戌知縣敖佐創建宅第完吏廨正儀門

作園亭遷馬廄制度秩如矣

正廳 五楹 幕廳 三楹在正廳左 六房 東西共一十九楹 銀庫

在正廳內居右 儀門 三楹 知縣第 在正廳後舊不能蔽風雨

知縣敖佐始捐俸葺治焉 縣丞第 在知縣第左 主簿第 在知

縣第右敖佐始建 典史第 在縣丞第之東 吏舍 在六房後

後 樂園 在縣丞第左 退思亭 在後樂園內 馬神廟 在儀門內居

右馬廄 在儀門外 獄禁 在儀門內居左吏舍以下俱知縣敖

儒學

在縣治西門外唐以前世遠不能徵宋有大觀聖作之碑元

至元二十七年知縣薛文暉重修宣聖廟皇慶二年知縣張洵重修講堂俱有碑元末兵燬

國朝洪武六年知縣王秩重建廟學語在元進士蒲城趙寅記正統四年知縣楊季琦增修宏治七年知縣楊泰增修語在中書舍人長安吉人記嗣是典守靡常傾圮日甚嘉靖甲辰知縣鄭光溥迺撤舊而新之語在尙書苑洛韓邦奇記戊申知縣徐效賢又環築土城以嚴捍衛創申名宦鄉賢二祠以修缺典歲在庚戌知縣敖佐首建號舍完二祠置祭器木邊二百二十銅爵二十規模制度漸備於前矣

敬一亭 三楹在明倫堂後嘉靖十年知縣洪廷玉奉 勅創

建明倫堂 五楹在先師廟後 東博文齋 五楹 西約禮齋 五楹

澄城縣志 卷一

教諭宅 舊在明倫堂左今廢嘉靖二十一年署縣州判楊茂

蘭卽宅內養濟院右建宅一區權居 訓導宅 舊在學宮西北

隅悉廢今卽學門內右建二區居焉 井 在學宮東南隅知縣

楊泰穿 講堂 在明倫堂後 饌堂 在講堂後 神廚神庫牲房 在

學宮巽 隅號舍 方員平直四連共二十四間堂後左右各十

間射圃 在饌堂左東向內有觀德亭三楹 學倉 在學宮東北

隅講堂而下今悉廢

石道立曰學宮諸已廢者不志可也顧學校

國家育才之地有司之首務係焉凡諸傾廢又其不可缺者

故志之冀興復也

社學

在縣治前左西向宏治間知縣楊泰徐政相繼繕修正德間就圯嘉靖初遺址幾沒於人教讀張東白於御史臺復還於官知縣徐效賢修建知州楊庭記今知縣敖佐於各里考選教讀訓迪子弟已濟濟可觀矣

石道立曰小學大學之根本也社學廢弛則蒙養無地望其小子有造不可得已昔上蔡李公督學政檄郡縣里置一學學設一師遴子弟可教者俾以時督率之嗚呼美矣厥後民乃無賴撤屋宇而薪之址多沒入民家惟教讀今猶設焉其告朔之羊乎有志復興者尙因而求之

又曰化民成俗教學爲先我

朝稽古定制二學徧天下甚盛典也然士者民之望士化則

澄城縣志

卷一

五

石本

民從之君子之爲政當自學始昔文翁治蜀不言政而言教蜀頌文翁不言治而言化知所先也有志孝學者勗哉諸行署

布政分司在縣治南偏東參政崔忠參議于璠各有題

崔詩

云一泐澄水尙依城避暑遺宮易治平錫地唐臣惟廟祀棚

槍漢主有泉名洛河岸柳人爭渡古戍花封鳥亂鳴欲訪王

氏貞節事斷碑荒塚草煙生于詩云古徵舊邑洛河邊聞訪

遺跡思惘然避暑殿爲參佛殿洗腸泉作谷溪泉長卿政美

存遺廟鄭魏功高有錫田歷代只今恩澤厚風流民物勝當

年按察分司在縣治東街副使曹璉提學伍福各有題

曹詩

云洛河東渡入澄城澗谷盤紆路少平漢武擗槍泉尙湧隋

文避暑宮空名春日古寨寒煙鎖夜靜荒陵鳥亂鳴惟有魏徵莊賜地祠中遺像凜如生伍詩云阡原落木曉霜凝按節衝寒入古徵避暑宮存思故主洗腸泉在說神僧日照羅谷丹霞爛瀑瀉雲門素練騰憶得叔敖爲政處去思碑石到今稱西安行府在布政分司右

雜署

陰陽學 在縣治東南隅北向今廢 醫學 在陰陽學稍西南向

僧會司 在精進寺 道會司 在崇壽宮 申明亭 三間在縣治前

居左北向知縣徐效賢建 旌善亭 三間在縣治前居右知縣

徐效賢建 榜房 六間在縣治右南向知縣敖佐建 稅課局 在

縣城南門內偏東南向正統二年裁革遺址存焉廣五丈袤

澄城縣志 卷一 六 石本

二丈 預備倉 在縣內左迤東南向 縣倉 在儀門外居左今廢

社 縣治及各鄉鎮俱有今悉廢 養濟院 舊在邑厲壇左知

縣安明善徙城內西小街舊院址尙在 漏澤園 在東郭外百

餘步舊址久沒 軍器局 三間在縣治右久廢 惠民局 三間在

縣治左久廢

石道立曰興利除害政之善物也吾澄稅課局官革而稅存矣惠民局名存而實廢矣社倉漏澤園法廢而址沒矣可除者猶未除可興者久不興民何以蘇哉 辛亥夏知縣敖佐查出漏澤園三畝餘在楊家莊後復屬於官

演武教場 在南郭外地十六畝知縣敖佐勘明開除稅糧二

石一斗八各里代納衆心允協焉

石道立曰聖人安不忘危故能久安長治我朝於天下郡縣置民兵以爲城守其慮遠矣乃今訓練亡實役作無藝俾民困而武弛嗚呼古以備禦今以備役立法之初意不曰荒哉

鋪舍

急遞總鋪 介於布政分司西安行府之間今廢餘有十四鋪

城東者一曰柳池達邠陽城東南者二曰撲地曰寺頭達朝邑城南者六曰鎮基曰交道曰懷仁曰安樂曰臨高曰白其達同州城西者二曰交城曰長閨達蒲城西北者三曰蟒猛曰藥鋪頭曰紅羅谷達洛川 已上鋪舍今適壞

鄉里 鄉凡三里凡四十

澄城縣志

卷一

七

石本

東南太平鄉領十八里 郭下長政奉政陽城通賢通振白龍

伏龍白其遵教寺前仁義西觀懷仁先進忠信通道業善東

北甘泉鄉領八里 王莊時莊三泉永平賢得武安安定太賢

西北王官鄉領十四里 吉安善化義井故東段莊長閨馮原

陰泉長寧永富太平良輔牙曲太慶

石道立曰按吾邑在宋金時凡六鄉今無歸義加泉高柏三鄉餘則仍舊焉編戶在

國初凡六十四里頗稱富庶至天順六年則併八里 崇賢常

興歸仁常熟常義橋南親鄰山前 宏治五年又併十六里

永豐豐樂新城中正臨高安樂光祿誠信義合玉泉路井

福原西下王莊奉祿良周 視諸初已減三之一有奇矣迺

今逃亡日甚或有里名而無丁數或有丁數而無田廬然而役作不減差稅屢增以虛存之里名受實征之隱禍此所以縣日益罷而民日益貧也 嘉靖間有併里之例有司惑於左右之言而止

鎮堡

良甫鎮

在縣北五十里因魏鄭公得名 馮原鎮 在縣西北五

十里 寺頭鎮

在縣東南四十里 瑤頭鎮 在縣西二十里 王莊

鎮

在縣西北三十里 嘉靖丙午邊聲告急知縣徐效賢奉檄

創築城堡三座曰遵義堡

即寺頭鎮 曰長閨堡 即瑤頭鎮 曰

太平堡

即王莊鎮 陝西都察院都御史謝蘭檄委典膳鄭穀

關宗仁喬廷前權汝止督修

澄城縣志

卷一

六

石本

市集

在縣關廂者其輪遞月無間日諸鎮則以日相遞而已

祠祀志第三

祠廟

文廟建置與儒學同

詳諸修學記

先師廟五楹東西廡各七楹戟門三楹柱以石櫺星門三楹自正殿直達於街軒豁洞明規模翼翼矣

啟聖祠三楹在先師廟左嘉靖十年知縣洪廷玉奉

勅創建

城隍廟在縣治西門外唐正元十三年建宋元豐中邑

正殿建廊廡進士李君記

李君失名記亦不傳 金仍舊貫元

初廟廡焚毀僅存正殿後至元四年縣尹宋傑重修縣尉劉宏遠記

國朝正統七年知縣楊季琦修宏治中知縣楊泰徐政重修嘉靖戊申知縣徐效賢始撤舊而廣之規模宏大矣路義楊存喬廷後劉守正督修有記

名宦祠三楹在學宮東南隅嘉靖己酉知縣徐效賢申請創建未就庚戌知縣敖佐始繼而成之

石道立曰名宦有祠可以考德可以觀政邑大夫之用意遠矣夫士臨民有德沒而民懷之乃祀其神俾依焉禮也政不務德者賊賊民之棄也又何祀矧夫史傳循吏志錄名宦志之所錄史實傳之顧可忽耶是故賢者不可忌而

廢也不肖者不可愛而厠也議斯禮者慎哉慎哉

鄉賢祠三楹在名宦祠右嘉靖己酉知縣徐效賢申請創建未就庚戌知縣敖佐始繼而成之

石道立曰按古者鄉先生沒則祭於社所謂鄉先生者取其言行足以範世勵俗不必其皆仕於時也無德而祀者謂之淫有德而遺者謂之闕淫與闕皆不可以爲禮是故大儒惟以明道爲尙而無取乎詞章訓誥之能名臣必以功德及人而不徒取乎爵位之顯忠臣甯以死諫比死節而事之不係安危者不與錄孝子而抑過中錄名儒而黜失行一鄉之祀奚容苟耶邑大夫徐效賢曰論人於一邑之中似不必吹毛求疵爲法於百世之下則亦當求全責

備真知言哉 知縣徐效賢查議名宦鄉賢牒文其畧曰看
得二祠之設所以褒表前修風勵後進關係匪輕修舉雖
責治於有司議論當公出於學校合行故牒該學即便會
查嘉靖改元以前官政人物某人治行特異有益地方可
爲名宦某人德學優長有裨風化可爲鄉賢各要擬議詳
慎推舉得人使後官知勸以宜斯民於是縣有無窮之福
後賢思齊有光斯土於是縣有無窮之聞無或查議不明
有乖 盛典

壇壝

社稷壇在城外西北隅知縣徐效賢申建如制風雲雷雨山
川壇在縣南郊知縣徐效賢申建如制邑厲壇在縣北郊鄉

澄城縣志

卷一

三

石本

厲壇舊各里俱有今悉廢 已上祠廟壇壝俱祀典所載故首
列之其祠廟不載祀典者附錄於後

唐魏鄭公祠在南郭門外偏西南向先是繪公像於縣學門
廡東壁宋宣和癸卯知縣張綱始建祠於縣之西郊又自爲
記金承安三年邑令艾元老以西郊荒僻仍徙今所建正堂
三間中肖公像及其五世孫魏暮執笏侍立於左東西廡廡
一十間廟門一所語在同州教授孫鎮記元至正七年縣令
竇本重修邑儒傅良弼記一在縣北二十里砲落村祠五間
繚以周垣宋龍圖學士王正言金尙書高有邦

國朝陝西僉事四明張楷各有題 張詩云古屋荒坪下青山
對茅茨停驂拜儀形宛然貞觀時念昔納諫日剴切無回忠

朝朝十漸疏古今良足師平原莽秋草封邑皆陵夷幸存馮
翊譜得考文貞祠今祠屋詩碑並廢遺址存焉

縣令鄭公祠在魏鄭公祠西貞元十一年建今廢

金縣尉趙公祠在岱嶽廟內大定十一年建今廢

金主簿李公祠在魏鄭公祠內大定二十三年建今廢

金縣令艾侯祠在魏鄭公祠東承安四年建今廢

皇明楊公祠知縣楊季琦祠也在魏鄭公祠迤南東向祠屋

一楹中肖公像四壁輒糞斧鑿不可破足以驗人心愛公之

至歷年既久棟橈瓦落四壁仡然獨存

石道立曰設祠祀德所以樹風聲揭芳軌爲後之長民者
勸也邑大夫徐效賢觀諸公祠宇傾廢奮然圖興復焉將

歲時瞻拜取緒餘以自補也不虞板築具而卒矣再噓厄
運之光不有待於今之從政者哉

延恩祠潼關兵備張禴祠也在預備倉之東北向承德八年

知縣韓齊建祠三楹中肖公像旁肖指揮張潛關建像侍立

焉語在邑令河東劉一中記

追思祠知縣徐效賢祠也在預備倉門西北向嘉靖庚戌秋

知縣敖佐奉檄建祠三楹中肖公像語在南京戶部員外吳

橋李懿記

玉皇廟在北郭門外迤西崇壽宮後

后土廟在北郭門外迤西

岱嶽廟一在寺頭鎮宋政和中建一在北郭門外金大定二

十七年知觀道士呂居仁重修語在鄉貢進士宗有記

龍王廟在縣西南湫頭西岸其地洛水經焉兩崖壁立水自高岸澹下狀如瀑布下有潭洞然深黑上常有雲氣能致雨正統中知縣楊季琦禱雨有感樹碑廟中語在教諭敘南李康記

風伯廟在風洞前每烈風作官具特禮詣廟祭之風隨息宏治中知縣楊泰重修

高伯成廟一在縣東南十五里一在縣東西下村舊有碑三娘子廟在陰泉之上

唐姚烈女祠在縣北定國村

金師節婦祠在縣南雷莊村勝國以前典祀今祠祀俱廢其

澄城縣志

卷一

三

石本

遺址存焉

寺觀

精進寺在東郭門外迤南唐肅宗時建習儀於斯僧會司在焉元將軍郃陽郭思德過此有詩

普濟寺在金沙谷上其下有佛圖澄洗腸泉禱雨輒應邑人相與創寺泉上名靈泉寺宋大觀丁亥馮翊久不雪郡侯郭公遣使迎泉水供事之翌日瑞雪應祈歲乃大熟侯奏其事於朝天子嘉賞大觀戊子四月錫師以真顯法師之號至己丑又勅賜普濟之名政和壬辰邑人曹景儉作記迺今爲佛寺所祀亦非澄矣地頗清幽騷人墨客歲時遊者吟咏日富今有鐫詩記邑人雲谷張廷用撰

泊平寺卽隋文帝避暑宮改廢

普化寺在縣南鎮基村宋熙甯間賜額

聖壽寺在縣西十二曲村宋熙甯間賜額一在歸安村

至德寺在縣南伏龍村宋大觀賜額

慧光洞在普濟寺東崖古名金沙谷相傳爲石勒時神僧佛圖澄卓錫地因祀之宋政和中邑人曹景儉有記迄今世改傳訛誤爲佛寺嘉靖甲辰寺僧常理法孫崇德始卽寺內東崖甄贊此洞肖佛圖澄像祀之

羅漢洞在縣東北門村

碧潭洞在撲地河

雷神洞在縣南窰底村

澄城縣志

卷一

三

石本

三清洞在和家莊

崇壽宮在北郭門外迤西唐建道會司在焉金節度中議太原郝子玉題崇壽宮觀妙堂一絕 至道由來瓦礫閒心通萬境不爲難道人若到觀空處此理殊無妙可觀

玉泉觀在玉泉之上盤山和陽子李君棲真之所碧水環流芹香縹緲羣峯轟轟若拱若揖溪山之勝概也延祐乙卯其徒純靜大師王永謙重修陝西諸道行御史臺監察御史彭衙潘汝劼撰記嘉靖己亥道人李教真修葺

白雲觀在三娘子川

保安觀在縣西北程莊村

迴鸞寺在縣南景家河隋文帝避暑迴鸞駐驛於此寺故以

名

暉福寺在縣北北寺村宋大和十二年建

甯國寺在縣北馬店村唐建

雲風寺在縣北平訓村宋建

大雲寺在縣南寺頭鎮

肅宗寺在縣西北王莊鎮

永興寺在縣西北永內村

青龍禪院在縣西北四十里洛水之陽

清涼禪院在縣西段莊村南元泰定三年重修宏治四年又修邑人進士許英記

大明禪院在縣東北門村延祐間重修宋熙甯間賜額

澄城縣志

卷一

寺

石本

大悲禪院在縣南中社村金大定壬申創建趙堯重修

存留院在縣東南西觀村金大定二年重修進士古舜巖曦撰記

廣濟院在縣南南社村金明昌間建

觀音院在縣東撲地河元至治元年重修

吉祥院在縣西南藺莊河

修真觀在縣東南二十里殿宇清幽林木蓊蔚相傳漢武帝求仙東遊梁山棲息於此故名代有修葺宏治乙丑居民李

泰重修

玄明觀在縣北匱谷村宋建

瑞雲觀在縣北遮路村西金昌明間重修

聚仙觀在縣西南蔡家河

三官殿在崇壽宮左西向金大定五年重修語在中山劉穡記

文昌祠在崇壽宮右東向洪武二十一年重修前鄉進士楊建中記

田賦志第四

田畝

嘉靖三十年總記官民夏秋地五千四百九十三頃一十七畝八分

夏地三千一百三頃四十二畝二分 內該官地二十七頃六十六畝 該民地三千七十五頃七十六畝二分

澄城縣志

卷一

三

石本

秋地三千三百八十九頃七十五畝六分 內該官地二十七頃六十七畝六分九釐 該民地二千三百六十二頃七畝九分一釐

戶口

嘉靖三十年軍民雜役戶共九千八百八十

內民戶八千七十三 軍戶一千二百三十 雜役戶五百七十七 內力士校尉二十四 各色人匠二百七十八 馬牛驢夫一百五十 斗級鋪司兵七十 廚役八打捕二 道人二 僧人一十一 樂人一十五

男婦口共七萬四千五百四十六 內男子五萬四百八十八 婦女二萬四千一百三十八

石道立曰我

國家之制稅糧科於土田賦役定於戶口紀之冊籍者昭如也。比年吏坊弗慎冊籍散亡。正德已土者不可詳載。土田之增損戶口之登耗孰從而稽之。雖然觀逋賦之多可以驗土地之瘠焉。觀里甲之供可以驗民物之耗焉。長民者將不惻然乎哉。

田賦

嘉靖三十年總計夏秋稅糧共四萬一千一十八石五斗八升二合七勺五抄一撮

夏稅一萬六千一十七石一斗七合八勺八抄四撮 秋糧二萬五千一石四斗七升四合八勺六抄七撮 馬草

澄城縣志

卷一

美

石木

三萬一千二百五十二束一十兩 桑一萬五百六十二株該絲綿三百三十二斤一十四兩科絹二百九十三疋一丈四尺 綿花地該綿花三十七斤八兩綿布一百八十二疋七尺二寸

石道立曰我

國家之患莫急於邊吾邑之弊莫叢於賦以吾觀於賦籍可爲長大息已先王之世畫一以賦民以安輯今吾邑兩稅動踰數萬科額紛沓莫可稽考長吏乍服官政未諳民隱一旦據案執筆雖精厯者莫能詳矧付之老吏滑算之手則低昂飛洒無所不至奸民巧爲規避求快所欲由是輕者多在豪家重者偏歸細戶間有貧鬻產者率積空稅不

能支卽逃亡累里中人矣雖額不可減求其通變之道惟有均糧庶幾畫一可調劑長吏按籍稱故事莫肯議處嗚呼其誰有以慰吾老羸之望矣乎

嘉靖三十年總計夏秋站糧價銀七千一十七兩一錢四分四釐八毫 視舊站價則增九百一十一兩一錢五分七釐

夏站價銀三千八兩七錢四分一釐 秋站價銀四千八

兩四錢三釐八毫 潼津驛馬二匹 邠州遞運所牛四

十隻 華陰遞運所牛三隻 渭水驛馬二匹 此係新添

石道立曰田畝正賦之外有站賦馬驢牛頭則年一易諸丁賦歲調力役事一無免焉馬頭舊惟二匹于今復倍之地不加多而額外之賦日增民力殫竭終歸亡徙其孰使

澄城縣志

卷一

三

石本

之然哉

丁賦

力差銀差總計銀三千二百三十兩三分三毫五絲 此係嘉靖二十九年

力差各項共銀九百二十六兩九錢 銀差各項共銀二千三百三兩一錢三分三毫五絲

石道立曰按銀賦中有解發富平縣顧車銀二十兩咸甯縣鋤鑿銀一十五兩一錢夫丁賦之設各有舊額顧迺取彼之賦而投之我譬之懦夫負百鈞而更益之吾知不蹶而隕者幾希昔人謂寬一分則民受一分之賜經國者轉移而調停之變其所變以復乎額之舊焉斯均矣

課程

諸課鈔每歲總計八千三百六十七貫八百九十三文

酒醋課鈔二百六十九貫九百文 油課鈔九十六貫

水磨課鈔四百七十五貫五百文 瑤課鈔二百八十九

貫五百文 官房課鈔一百三十七貫五百七十文 商

稅課鈔五千六百六貫八百三文 門攤課鈔一千二百

九十貫五百一十一文

物產

澄城無他奇產獨食資五穀服資木綿卽樂歲猶多枵腹及
不能完衣者爨資石炭器用資黑磁石炭黑磁瑤頭鎮特產
炭井深三百尺藥稱黃芩蒼朮柴胡防風遠志知母采色則

澄城縣志


卷一

六

石木

有礬紅供牧則有苜蓿毛羽野畜則有黃鼠山雞山林不甚
深無虎豹水惟細流故魚稻則絕無焉諸產同他處者不悉
載

石道立曰雍州之地黃壤厥田稱上上今吾邑東南地稍
潤西北皆塙壤其溝澗荒蕪者又半之以故澄城民獨貧
少生業嗚呼執全勝之古雍以例困弊之下邑無惑乎逋
者日甚而存者日困也和來安養之責不屬之良有司哉



澄城縣志二卷

玉泉石道立 撰次

儒學教諭魏天瑞訓導王畿王廷弼 校正

官師志第五

封錫

周壤駟赤秦州人孔門弟子長於詩書唐封北徵伯宋加封上邽侯

秦公子鍼秦桓公之子景公之弟食邑北徵國語云秦有徵衙又云秦徵衙實難桓景

後魏裴文舉河東聞喜人西魏時以掠地功封澄城子後進爵爲伯子胄嗣

澄城縣志

卷二

石本

唐魏徵字玄成魏州曲城人少孤有大志隱太子引爲洗馬徵見秦王功高陰勸太子早爲計太子敗王責曰爾聞吾兄弟奈何答曰太子早從徵言無今日禍王器其直無恨意卽位拜諫議大夫或引至卧內訪天下事徵亦自以爲不世遇凡二百餘奏無不剴切當帝心三年豫朝政七年進封鄭公及薨帝臨哭爲之慟罷朝五日贈司空謚曰文貞其賜莊在唐上輔馮翊郡之北徵子孫世居焉所居之村曰修善鎮曰良輔驛曰賢相命名之意皆以公故也公之家世蒙給復下逮五季宋初亦然韓魏王琦西帥時奏於官大觀政和間賜其十五世孫魏道嚴銀六百兩絹五十端至金定國軍節度使傅又申諸朝贈其十七世孫魏世祥嗣守其先塋 同州爲

定國軍元復爲同州 魏姓鉅鹿郡公撰碑文自書鉅鹿輿圖云真定府晉州人真定順德皆古鉅鹿而順德又爲魏郡職官

唐宗義仲南陽人永泰間以上柱國遊擊將軍調澄城令擢監察御史大理少卿嶺南節度判官有去思碑今廢

鄭楚相字叔敖鄭州滎陽人先爲東觀校書郎秩滿從調判及殊績授長安尉後爲澄城令用簡成賦由平頒役人閑歲安風清雲明百姓孫士良等請命朝省貞元十一年詔諭銘紀功德於其理所之南門語在唐司封郎中集賢殿學士陳京所撰鄭公德政碑元和三年爲水部員外韓文公同時友也

澄城縣志

卷二

二

石本

白潛成貞元十四年爲縣令

房啟河南人善清言大父融父瑋相繼爲相啟胚胎餘光生長食息不離典訓始爲鳳翔府參軍人吏迎觀望見咸曰眞房太尉家子孫也不敢弄以事轉澄城丞益自飭理同官憚伏後累功進至刑部員外郎又徵拜虞部員外郎遷萬年令果辨傲絕貞元末舉爲容州經畧使拜御史中丞封清河郡公食邑三千戶

李邠隴西人雍王繪之後陝府左司馬邠之子韓昌黎門人李漢弟也嘗爲澄城主簿

宋种詠洛陽人种世衡第三子世衡种放兄子也慶厯初爲澄城尉范仲淹稱其有立

呂大防字微仲藍田人登進士第嘉祐間知縣事庚子春同
兄大忠晉伯弟大臨與叔尋春匱谷酌隋公泉題名石壁英
宗時除監察御史哲宗召爲翰林學士拜左僕射不事邊功
而天下自然富庶

石道立曰按丞相呂汲公關中巨儒也其爲縣之績無聞
惟岱嶽廟記中稱其有遺愛焉夫謂之遺愛其政必有大
過人者惜文不足徵無以詳其實耳雖然觀相業不可以
徵爲令哉

蘇堯卿字君俞元祐王申以宣德郎知縣事

鄭珙字進道元祐王申爲縣尉

韋夷道字子平紹聖乙亥知縣事

澄城縣志

卷二

三

石本

作思恭大觀二年以將仕郎爲縣尉

王浹汝陽人大觀庚寅知縣事

周詵政和六年以承議郎知縣事

劉商議字叔監宣和初元知縣事後至宰相隋公泉題名刻
云大丞相劉少逸公昔化一邑遺愛猶存今澤被天下斯石
可泐而盛德無窮矣

張綱宣和二年以奉議郎知縣事兼兵馬都監創建魏鄭公

祠祠記卽其所作也

張用弼

承陳履

簿趙光德

尉吳鏐

以承節郎兼酒稅務

党琳

以保義郎兼酒稅務

張永錫

以修武郎兼市易務兼抵當庫

俱宣和二年任

宋珣字子璋宣和間任主簿

金趙規字君模中都安次人以蔭補官大定間來尉是縣勸課農桑安集疲氓察奸慝恤貧乏憎強暴破梟賊杜請託之門絕奸邪之路邑人立祠祀之語在德政碑

李完字道全朔州馬邑人八歲中神童科總角隸進士旣冠調石州司候後授澄城主簿多善政大定癸卯奉勅改授忻州定襄尹旣去士民劉玠等立祠樹碑以示去思之意後擢沁州刺史累官至南京路按察使所至奸惡屏跡民皆便之語在進士韓原王山甫所撰德政去思碑

高德甯明昌二年以廣威將軍行澄城縣令上騎都尉廣陵郡國子食邑五百戶

澄城縣志

卷二

四

石本

趙揮明昌二年以宣武將軍行澄城縣主騎都尉天水郡開國男食邑三百戶

馬丙亨明昌末任主簿業已受代而遽告逝遺六女一孫甫幼邑令艾元老哀其孤寒皆爲擇良配而婚之其婺得釋重累還鄉

艾元老字長卿大興人以父蔭入仕先爲淳化令承安二年爲澄城令寬而能斷嚴而不苛有遺愛及民後爲定遠大將軍去後邑人蘇居仁等立祠於文貞公廟之東語在教授孫鎮所撰遺愛碑

劉伯仁以將仕郎行縣丞

牛顯仁以昭信郎行主簿

石株字守道以校尉行縣尉飛騎尉以上俱承安二年任
元禿魯失迷前至元二十四年以進義副尉爲縣達魯花赤
薛文曜字彥輝丹陽郡人前至元二十七年以從仕郎知縣
事剛方清慎勞績著聞獄空訟簡時和年登嘗捐俸金以修
廟學民樂趨事效勞者不期而至

郝思仁字德甫平陽人元貞元年以徵仕郎知縣事嗜經史
重儒術居官任公臨事有決廉而不貪和而不同爲政屢有
能聲

石道立曰勝國以前官師多一時適有興作寓名金石者
今並列于篇其政績之詳尙俟博古君子

國朝知縣

澄城縣志

卷二

五

石本

韓莊吳二年任

王秩洪武四年以從事郎知縣事戢吏愛民肇興學校宏建
百規開光來者

文蔚永樂九年以承事郎知縣事

王秉彝四川重慶人成化初以風憲左遷知縣

崔珽河南通許人舉人

王敬山西潞州人舉人

楊剛四川巴陵人舉人成化十九年任剛方有爲刑杖取二
棍合而用之時呼爲雙棍楊未期而卒

秦銘趙州人例貢

侯璽山西長子人由舉人先任白水正德初以才堪治繁調

澄城嚴明剛斷惡衣菲食教百姓種植桑棗課生儒勤篤學業人始畏而終慕之擢知商州官至僉事

韓齊山東青城人由舉人正德六年任時妖賊李午擁眾陷洛川脅縣令妻子殺之屯兵彭衙漸逼澄城居民逃徙奔命齊告援於潼關兵憲張禴卒獲撲滅澄人德之嘉靖庚戌知縣敖佐設木主配享延恩祠中

李綸甯海人監生正德十二年任清慎有爲五月而卒貧不能歸諸生請於當道移檄云公論旣出於學校起送宜倍於尋常由是始得旅櫬還鄉

孫璉河南新蔡人由舉人正德十三年任端重耿介節用愛人

澄城縣志

卷二

六

石本

鄭光溥字伯公山東益都人北畿丁酉解元登戊戌進士授廣西道監察御史癸卯秋左遷心不苟察而吏自畏其威政尙寬平而民益懷其惠以王道飾吏治以正學教生儒文章政事皆可師法視篆未二年新縣治興廟學作新士類具有成績擢知華州士民泣送載路如失慈母戀戀不忍舍留靴懸之譙樓且歌曰侯實父母難借易別五馬在驂去不可遮千古遺愛瞻仰此靴居者墮淚行人口碣後陞南京戶部員外山西提學僉事今陞四川參議

徐效賢字宗義四川江津人由舉人嘉靖二十四年任至則詢民疾苦訪求利病勤催科息門訟興學校修武備浚井泉完城郭秩神祠營公署懇久荒之田恤無告之民言成物範

清畏人知有古循吏之風感德之民多圖像祀之故時人有
今鄭宛如古鄭今鄭謂光溥古鄭謂楚相後徐又似前徐之

語後徐謂效賢前徐謂徐政歷官四年衣不重襲食無兼味

比卒士民哀之來弔如歸市既期父老百餘人錄其治行列
諸牘以祠祀請郡守可之移檄建祠歲時致祭焉今學宮又
有吏坊詳記邑人斷事馬躍如撰公沒後十日所樹也

石道立日欲知徐大夫之賢觀諸請祠事彰彰矣夫生而
民戴之死而民懷之懷之而終不可諉也又羣然請諸郡
而祠祀之徐大夫之於民有遺愛哉

縣丞

吳二年有郎申洪武初有樂韶姚宗敬韶臨川人多善政今
澄城縣志

卷二

七

石本

有遺愛碑可考也

主簿缺

典史缺

教諭

吳二年有冀榮洪武初有王煥嗣是則有宋濟舉人洛陽劉

亮舉人李春敘南李康偃師石煥舉人句容胡漢舉人洪洞

緒昇內江李思齊真定衛馬廷璽舉人正德間則有廣安何

謙越嶺劉思安陽劉佑高原劉永昌嘉靖間又有馬湖楊孟

簡玉田吳傑汝州何相巴縣馮鉞凡十有九人亮先授華州

濱州訓導正統八年考最遷澄城教諭俗慝直難訓亮用剛

克畢就矩矱居三年以憂去值道梗諸生共推勇力者護之

後以子劉健貴贈光祿大夫柱國太子太保禮部尙書兼武英殿大學士煥與漢時皆以善教稱廷璽則以善教擢知縣劉佑才識高遠動必以正教人以窮理爲先正德壬申妖賊李午陷洛川逼近澄城四境騷然佑告援於潼關兵憲張禴城郭人民卒賴以全其所以繫民思者又不獨善教已也嘉靖庚戌秋知縣敖佐設木主從祀延恩祠中質諸輿論最爲稱情云佑之後若永昌則陞衛學教授何相則陞王府教授餘無能述焉今有魏天瑞字休徵順德邢臺人由監生嘉靖二十九年以陳留訓導陞任

石道立曰

國家養士責在學官其任顧不重哉而或者不以古道自處

澄城縣志

卷二

八

石本

獨何歟余作志特表章師儒之賢者俾司教者鑒焉
訓導 缺

人物志第六

宦達

元竇邦傑前至元間任廣安州知州

趙信遵教社人東漢趙岐之後初以儒生貢河西隴北道廉訪司泰定四年授邠州新平縣尉元統元年以從事左郎授夔州路總管府知事後至元丙子追贈父慶爲從事左郎奉元路澄城縣尹

鄭英陝西行省參知政事

石道立曰吾澄之士其進用於時者詳矣諸君子豈無表

表可稱述者顧縣人無志今且無述後將何傳吾爲此懼
欲遍詢以著其實而未之逮也姑以行誼顯然者附錄餘
俟高明君子補入昔人謂蓋棺而後論定故生者不列其
行事

雷清字潔已淳謹好讀書元季以秀才辟辭弗就或勸之仕
則曰時不可爲矣未幾亂作人服其先見處亂世遜言危行
卒免於害及海內平定迺以舊產讓弟徙居洛城優游卒歲
無復有仕進意縣令舉爲耆賓歲荒請於

朝發惡賑之民全活者甚衆澹然無德色翰林侍講兼修

國史吉水羅汝敬曰先生以才見試於有元以耆德見徵於
天朝以惠澤衣被於鄉之窮餓人蓋有道之士古所謂鄉先

澄城縣志

卷二

九

石本

生歿可祭於社者也後以子恭貴封交趾道監察御史

國朝潘友直字孟舉洪武初由茂才舉從

太祖高皇帝江上克勦陳友諒屢畫奇策陞南京工部尙書
所至輒有聲績習儉服勤終始一節後乞骸骨歸朝廷寵賜
大銀歸邸悉賞軍士同妻驅驢而歸不乘驛傳行李蕭然惟
圖書數卷而已

上使人矚知之嘉其清介賜鄉宴終其身先生益亮節砥行
不詣公庭不干官政薄田做廬宴如也後以壽終於家

權仕安字惟甯洪武二十三年由人材授大名府南樂知縣
至則詢民疾苦勸課農桑修葺廟學城郭祠宇壇舍百廢畢
舉政暇則勉勵學校文風藹然

雷恭字時敬清之第五子由舉人初授交趾道監察御史出按山西風裁凜凜時大臣有不法者卽抗疏劾奏之蹇諤自將權倖側目天順初與御史楊瑄劉泰等極論石亨擅權中官潛謀

英廟謫戍遼東後山西王虎鎮崇弄小兒術士驅遣不能除有達者朱書監察御史雷數字貼小兒背遂就安今彼地猶有雷打鬼之名

石道立曰士君子立朝事君忠爲大孟舉之勦友諒時敬之論石亨濯濯侃侃忠舉勞流於澄不有光耶俎豆學宮
二先生吾無間然矣

鄭贇字廷器知青神縣事六年清而不污行資之外無餘物
澄城縣志 卷二
石本
時與其廉焉

曹貴字天爵初授北京金吾後衛經歷擢判深州時滹沱河決乃起夫萬餘掘壅塞豐隄防不踰月河復如故深人德之
宋志聰字文會由序班轉華亭縣丞素性穎悟治內外事循規矩言必忠信非道義絕不出口

王淳字子厚誠篤長者也博學能詩文任保德州學正能以所學淑人解官歸慕司馬溫公爲人每舉動必書曰吾用以自考也接人無大小貴賤一以誠御之讀書談道老而彌篤時稱古君子焉

李瓚字宗器忠信質實好學之心老而不倦官至潘府長史許英字文傑初授南京戶部主事督糧有方陞本部員外郎

中每承委任不愆于經後以疾卒于家

馬附字世臣授絳州訓導諸生問難者填門墻擢知代吉二州視民如傷比卒于家吉民間訃多來弔祭者

宋應奎字廷佐以歲貢從侍御史按歷四川性素豪縱不屑小嫌與侍御不合憤鬱而卒

田畊字舜夫初任大谷知縣後知廣陵二年邑乃大治遷順德府判專理京儲事集而不擾

楊得春字伯魁任偃師縣丞偃師北當卽山西北有黑龍潭每夏秋霖潦水決入城如注官民罹其患公率徒役數百人修白虎堰障於東南怒濤不復爲患又嘗通縣北舊絕水之泉平高邑久不均之稅民到于今稱之

澄城縣志

卷二

七

石本

鄭經字大經初任遼東大僕寺行主簿克勤綜理益懋操持最績足書賢名允著陞山西繁峙知縣歷官十二年行囊所有僅足以資路費

廉先生諱仲祥字天瑞甘貧嗜學誨人不倦讀書以窮理爲先爲文以意會理以辭達意不爲嶄絕奇詭之體講說獨喜蔡虛齋蒙引曰學貴窮理文詞非所急也先生形體癯然若不勝衣至譚道義卽滾滾如懸河一時學者多宗之道立總角時卽獲侍先生目擊道存啟發之教宏矣

周世傑字廷英任原武主簿憲直循理公清守法民以長者稱之

孫麓字天錫初授吳江水利丞暨墮出淪歲用大熟再丞溧

水職專理餉會驕陽如焚租徵如額乃移牒中丞徵視總入
後陞南溪知縣卒

白潔字淨之初授懷安衛經歷單騎之任不攜妻子妻卒誓
不再娶考績擢道州同知致仕平生朴實耿介廉靖寡欲有
古君子風

杜莘字時暢任峽縣訓導時流賊據縣洪厰舖莘方署縣募
得精兵數百人襲擊大破之

雷鉞字德威少有雋才屬文輒能驚人小詞尤撫媚士人爭
慕效之後以貢補咸甯縣侯府訓導尋改靈山衛司訓卒於
官張雲谷詩曰道方無俗樣心樂任官移觀此可以知其人
矣

澄城縣志

卷二

三

石本

張紀字廷憲歷任鉅野河津縣丞清謹剛方民心畏服未五
十致仕知府王青門留之竟浩然歸矣

許世昌字順德任太和知縣以賢能擢開封府判陞順慶同
知陳情歸養起復承天卒于官

楊庭字汝直初知大原縣大原民好訟庭莅事嚴明歲餘俗
革擢知雅州除虎患弭江害于雅人稱有德焉

權隆字世熙任懷來衛經歷誠確清謹人以活佛目之屢膺
委用人莫敢欺焉

張廷用字以忠博洽能詩文歷任屯留羅山知縣所著有宋
元小學史斷行世雲谷詩集詩話藏于家

馬躍如字凌霄任大同斷事勤幹清苦疑獄多所平反當道

與其能後謝事家居事有難決者人多就而謀之

白鸞字應和任河南府判主庾餉兼河道務極叢冗罔弗卽敘藩臬器之

田養民字希仁任德威二州知州治理有方事繼母能得其歡心後以疾卒于官

路金字寶之性剛介通尙書學居家篤于孝友後授豐潤簿專督馬政每番例得錢若干縉乃一毫不取甫期月疾作或勸之納賄輒怒叱曰欲吾不瞑目泉下耶不旬日乃卒貧幾不能歸足以驗所守矣

石道立曰吾邑諸君子居家而行修居官而政立者當不止此予生也晚有不能盡知焉姑列聞見所及者如右其

澄城縣志

卷二

三

石本

所紀述不敢不嚴且實安知其無誤與漏也若曰枉是非而私爲軒輊則吾豈敢

選舉 進士 鄉貢 歲貢 例貢 缺

孝子

李茂生員母党氏患惡瘡茂口吮膿血每夜焚香祝天願以身代母歿結廬墓側時暴雨如注懼水嚙母墓覆而號泣條然雨止人以爲孝感父歿廬墓哀毀如母天順六年 旌表
李表茂子同弟監生李森善事父母克修子職親終同廬墓所宏治七年 旌表

党衷監生性篤孝年十三母亡卽欲廬墓父止之後父卒廬于墓側食粥飲水負土築墳植柏數十株鬱然成林烏雅羣

集白兔馴擾宏治八年 旌表

李後監生父表歿後方弱冠哀毀骨立結廬塋側朝夕拜哭及母卒復廬墓含哀三年正德二年 旌表

韓舜璿通振里人天性純孝母歿欲廬墓父止之乃居中門之外夜則卧苦枕塊晝則奉父甘旨三年不入內寢母素畏雷每雷聲作卽奔號墓旁不啻衛護然雷止始歸嗚呼舜璿殆事死如生者與

田占 先進里人姚珊 業善里人 親終俱廬墓哀毀惡衣菲食

三年如一日時與其孝焉知縣敖佐扁珊之門曰優崇孝行烈女

姚氏縣北定國村姚某女也相傳爲唐時人女嫂李氏不得

澄城縣志

卷二

而

石本

於姑每鞭笞女輒以身覆之及笄將適人忽正襟危坐而逝嫂念舊恩以死相從於地下鄉人立祠祀焉今祠肖女像眞骸包泥像中人嘗以簪錐挑視之其骨色黃如金前生一柏覆祠上柏腹兩乳隱起相傳謂嫂所化生遠近異之

國朝節婦

王氏大賢里梁孝恭妻元至正間年十八卽寡居中更兵亂節不少易奉姑以盡其孝育子以成其家有司狀其事洪武七年三月 旌表

蔡氏郭下里石愷妻廩膳生蔡郁女年十九生子秉常甫六月而愷卒時祖父母俱存年且八十姑李氏孀居亦年六十氏堅守一節仰事俯育辛苦萬狀後祖父母及姑各以壽終

喪葬如禮子亦成立氏平日居家嚴正雖對子姪未嘗有笑容族里咸敬仰之有司奏 上其事宏治十八年三月 旌表卒年八十有三

廉氏業善里李吉妻年二十四夫亡一女在襁褓誓不再適孀居六十年終始一節有司奏 聞 旌表

周氏業善里姚璉妻年二十而夫亡零丁孤苦紡績自給至五十七而卒人無間言有司奏 聞 旌表

王氏大賢里鄭伯玉妻年十九適伯玉生子漢方七歲潔方五歲而夫亡姑魚氏孀居治家嗃嗃然氏一以柔順將之卒能得其歡心成化二十一年大饑有勸之他適者氏以死自誓事姑以終天年育子以成家道孀居四十餘年無非議者

澄城縣志

卷二

五

石本

知縣敖佐扁其門曰節孝

孫氏王代里白洪妻夫早卒氏孀居四十餘年克勤紡績處妯娌以和勝育夫弟之女如已出且厚粧歸之教子檀成立今爲國子生知縣敖佐扁其門曰節壽

馬氏臨川馬處士會之女廉先生仲祥繼室也先生素寒士妻亡貧不能更娶處士曰生女得配奇士財不足論也遂命歸廉氏年二十八夫亡所生二子俱幼撫育前妻子介過於所生日非此子無以立門戶也茹苦含辛劬勞萬狀至今年踰七十未嘗一日去介介亦忘其爲繼母也且其一節自守始終不渝婦道母儀馬氏兩無愧矣知縣敖佐扁其門曰賢節

和氏先進里田達妻年二十二而夫亡謹守閨門誓不再醮撫育二子今俱成立知縣敖佐扁其門曰貞節

石道立曰昔黃霸治潁孝子貞婦日以衆多蓋民罔恒習惟上所化導民之路可不慎哉是故君子貴反躬以立教修德以先民

義士

鄭鑑大賢里人正統二年歲饑出粟麥一千一百石用助賑濟有司奏 聞 旌表

袁忠寺前里人正統三年軍士乏糧出粟八百石入甯夏倉有司奏 聞 旌表

習玉先進里民成化乙酉歲饑同其孫璟出粟以賑鄉里有

澄城縣志

卷二

三

石本

司嘉其賢賓於鄉飲

習朝用邑庠廩膳生嘉靖初廢城隍廟中有旅櫬不歸葬者三年漸有發其棺暴其屍者朝用卽邑厲壇之良隅掘一坎瘞之仍設奠致哀焉

石道立曰昔溫公爲劉太序賻并錄劉永一以下四人國史因之作傳陶九成輟耕錄載王義士等七人而七人者遂聞於天下後世吾澄諸義士亦表表可稱焉故志之用以告采風者

戚畹

夫人潘氏工部尙書潘孟舉孫潘溫女天順初配宗室鎮國將軍公鈔生子誠瀘授輔國將軍

夫人鄭氏銅城主簿鄭照長女成化十八年配宗室保安莊
簡王次子鎮國將軍誠淥

鄭杰大賢里人天順間配宗室保安王女醴泉縣主

封贈 缺

武職 缺

仙釋

東晉佛圖澄西域人本姓帛氏少出家清貞務學能役使鬼
神晉永嘉四年入中國息於澄城其左乳旁有一孔通徹腹
內常塞以絮至夜欲誦經則拔絮一室洞明或至水邊引腸
洗之還復納入今縣有洗腸泉

宋李道謙字受之號海容子澄城人世業詩書精醫學苦留

澄城縣志

卷二

七

石本

心於素難宋紹定庚寅兵革之後年及知命穎悟全真禮寂
照通玄王真人爲師舍俗出家於縣西三娘子川愛其山水
清幽結庵以居自扁曰白雲觀取陳希夷一片野心已被白
雲留住之義日施藥濟人一方咸賴更生所謂棄名利而甘
肥遯者與

石道立曰蟬脫羽化涉於誕空門覺路流於無仙釋非吾
儒所可道也其何以志君子曰觀煉術而得守氣之資觀
戒律而得凝心之理矧高人逸士託而逃焉者有之君子
觀此可以慎術矣

雜志第七

陶枕

大賢里鄭某嘉靖間於親鄰寨中掘得一陶枕制頗工緻中央有刻云天聽寂無音蒼蒼何處尋非高亦非遠都只在人心兩旁對刻云賣酒樓頭風颭颭織織梭畔雨瀟瀟不知何謂莫考其自吟則康節筆也雲谷詩話

文鬼

嘉靖庚寅夏玉泉子面生惡瘡數日瘡且腫潰亂如祟忽自誦曰鬼火三更夜鵲聲二月天又土埋千古恨月照一天愁又窮猿悲夜月孤鴈唳秋風又孤窆荒墳空夜夜琪花瑤草自年年悽惋之詞誦不絕口家人不能悉記俄而索水或以碗水與之一吸而盡又大聲誦曰飲瀑布之清冽迴膏肓之沈痼已卽瞑目而卧須臾瘡腫消而甦矣詢以前事余茫然澄城縣志

卷二

六

石本

莫知也辛卯夏六月罹丙子之變識其日正誦詩時也人以爲鼓盆之讖人妖

嘉靖初縣治前一民家婦月辰就褥產一物其狀如人頭口耳俱無惟有十數目叢頂上張眼不時婦望見驚怖幾死尋卽棄去茲殆人妖乎

石道立曰子不語怪固矣志鬼志妖何也蓋事有弗經道或詭常通幽明之故窮時事之變君子謂之博物矧街談巷議稗官有錄而齊諧燕說又君子所不廢耶

闕疑

志傳信之書也孔子稱史闕文貴信焉耳舊謂吾澄進士唐

有姜以度宋有劉處約孟吉元有羅知微又謂迪家河有孟
尚書墓義井村有羅尚書墓羅家窠有羅元帥墓今未的姑
闕之以俟

正訛

志考覈貴精舊謂壤駟赤縣南避難堡人樊噲縣西雷家河
人蓋文達縣北蓋家窠人裴垺亦作澄城人今按一統志雍
大記諸書駟亦秦州人噲沛人文達冀州信都人陝西通志
亦疑文達爲澄城人蓋據本縣彼時志草之誤垺聞喜人又
謂白起墓在武安村樊噲墓在雷家河魏徵墓在大賢村按
一統志起墓在杜郵亭噲墓在樊川魏徵陪葬昭陵又謂佛
圖澄墓在文廟卜按神僧傳澄卒于鄴宮寺窆於臨漳西紫

澄城縣志

卷二

五

石本

陌舊說訛誤今正之

補遺

志采摭貴博吾澄窮荒下邑書籍不備卽兩漢書且無全帙
自晉唐而下迄於金元諸史則絕無焉將何所考也他日獲
覩諸書嗣有所得當續志之

澄城縣志後跋

玉泉子曰余為澄城志其事則徵諸見聞採諸金石其義例則倣諸大史康對山武功志宗伯呂涇野高陵志其詳略可
否余竊不自知正訛補缺則敬望後之君子志甫成徐侯即
捐館今大夫滄州教侯慎修職方之教始入黎獲底績焉昔
明道在鄆晦翁在南康皆首重志事二侯茲舉謂之善學程
朱非耶嘉靖辛亥春又識

石子脩先生縣志二卷原板久軼聞同里姻丈張明經南

金家舊藏刻本為及門石兵揮持去家弟莘田仰伊囑明

經子遴發力索之竟歸烏有此係遴發少時所鈔十年前

莘田命子葆貞借攜城固字多錯訛官師志缺主簿典史

澄城縣志

卷二

三

石本

訓導人物志亦遺數條選舉以下則全無焉或鈔時另為
一冊抑即崇禎間梁丞刪本未可知也暇日取路志校正
以卷中藝文篇名臚目別錄命兒輩繕存距莘田之歿已
六年矣臨筆不勝涕零道光二十八年戊申二月初吉邑
廩生任景伊南園氏記時年六十有八

